


სამახსოვრო ამომრჩეველთა რეგისტრაციის კომისიის წევრისთვის

განკუთვნილია იმ საარჩევნო უბნისთვის, სადაც კენჭისყრა
ელექტრონული საშუალებების გამოყენების გარეშე ტარდება

წინამდებარე რესურსი მომზადებულია საქართველოს ცენტრალური
საარჩევნო კომისიის და სსიპ საარჩევნო სისტემების განვითარების,
რეფორმებისა და სწავლების ცენტრის მიერ.

სამახსოვრო ინსტრუქცია წარმოადგენს დამხმარე რესურსს კომისიის
წევრის მიერ ფუნქციის შესაბამისად ამომრჩევლისთვის კვალიფიციური
სერვისის განსახორციელებლად.



კენჭისყრის დაწყებამდე, კომისიის თავმჯდომარე ამომრჩეველთა რეგისტრატორის ფუნქციის შესასრულებლად გადმოგცემთ:

- ანბანის მიხედვით დანაწილებულ ამომრჩეველთა ერთიან სიას (სამაგიდე სია ფოტოსურათებით). ერთ-ერთ რეგისტრატორს აგრეთვე გადაეცემა ამომრჩეველთა სპეციალური სია (ასეთის არსებობის შემთხვევაში);
- სამივე სახეობის საარჩევნო ბიულეტენის თითო ბლოკნოტს - საკრებულოს პროპორციული, საკრებულოს მაჟორიტარული და მერის არჩევნებისთვის განკუთვნილი საარჩევნო ბიულეტენების ბლოკნოტები (უნდა შეამონმოთ საარჩევნო ბიულეტენების რაოდენობის სიზუსტე და კომისიის თავმჯდომარესთან ერთად ხელმოწერით დაადასტურეთ ბლოკნოტების თავფურცელზე არსებულ მიღება-ჩაბარების აქტებში);
- სპეციალურ სახაზავს;
- მარკირების სითხეს;
- სანერ კალამს (ამომრჩეველთა სიაში ამომრჩევლის მიერ ხელმოწერის დაფიქსირების მიზნით);
- რეგისტრატორის სპეციალურ ბეჭედს.

კენჭისყრის დაწყების შემდეგ, ამომრჩევლის რეგისტრაციის და საარჩევნო ბიულეტენის/ბიულეტენების გაცემის პროცედურა განახორციელებთ შემდეგი თანმიმდევრობით:

- I. სთხოვთ ამომრჩეველს წარმოგიდგინოთ პირადობის დამადასტურებელი დოკუმენტი.

ყურადღება!

ამომრჩეველი კენჭისყრაში მონაწილეობს თუ წარადგენს პირადობის დამადასტურებელ ერთ-ერთ დოკუმენტს:

- საქართველოს მოქალაქის პირადობის ელექტრონულ მოწმობას;
- საქართველოს მოქალაქის პირადობის არაელექტრონულ მოწმობას (რომელსაც არ აქვს ინფორმაციის ელექტრონული მატარებელი);
- საქართველოს მოქალაქის პასპორტს.

- II. შეამოწმეთ პირადობის დამადასტურებელი დოკუმენტის მოქმედების ვადა. საქართველოს მოქალაქის პირადობის არაელექტრონული მოწმობის წარდგენის შემთხვევაში შეამოწმეთ პირადობის დამადასტურებელი დოკუმენტის გაცემის თარიღი.

ყურადღება!

თუ ამომრჩეველი წარადგენს ვადაგასულ პირადობის დამადასტურებელ დოკუმენტს, ან ძალადაკარგულ საქართველოს მოქალაქის პირადობის არაელექტრონულ მოწმობას (ძალადაკარგულია 2011 წლის 27 ივლისის ჩათვლით

გაცემული არაელექტრონული მონმობა), მას ეკრძალება კენჭისყრაში მონაწილეობა. ამომრჩეველს განუმარტეთ კენჭისყრაში მონაწილეობაზე უარის თქმის საფუძველი და მიუთითეთ, რომ კენჭისყრაში მონაწილეობის უფლება მიეცემა, თუ წარმოადგენს მოქმედ პირადობის დამადასტურებელ დოკუმენტს.

III. შეადარეთ ამომრჩევლის პირადობის დამადასტურებელ დოკუმენტში არსებული სარეგისტრაციო მონაცემები ამომრჩეველთა სიაში არსებულ მონაცემებს.

ყურადღება!

ამომრჩეველი კენჭისყრაში მონაწილეობს, თუ ამომრჩეველთა შესაბამის სიაში საქართველოს მოქალაქის პირად ნომერთან, სქესთან და ფოტოსურათთან ერთად, სრულად ემთხვევა ქვემოთ ჩამოთვლილ მონაცემთაგან 3 მაინც:

- სახელი;
- გვარი;
- დაბადების თარიღი (რიცხვი, თვე, წელი);
- მისამართი (საქართველოს მოქალაქის პირადობის მონმობის ან სააგენტოს მონაცემთა ბაზის მიხედვით, რომელიც მოიცავს აგრეთვე საზღვარგარეთ რეგისტრაციის ადგილს).

ყურადღება!

თუ ამომრჩეველთა ერთიან ან სპეციალურ სიაში ამომრჩევლის შესახებ მონაცემები არ მოიძებნა, აცნობეთ კომისიის თავმჯდომარეს. კომისიას აქვს შესაძლებლობა, პლანშეტის გამოყენებით მოიძიოს ინფორმაცია იმ საარჩევნო უბნის შესახებ, რომელშიც ამომრჩეველია რეგისტრირებული.

IV. შეამოწმეთ ამომრჩევლის პირადობის დამადასტურებელ დოკუმენტში და ამომრჩეველთა სიაში არსებული ფოტოსურათის და ამომრჩევლის სახის ერთმანეთთან შესაბამისობა.

ყურადღება!

თუ ამომრჩევლის შესახებ მონაცემების შემოწმებისას დადასტურდა, რომ წარდგენილ დოკუმენტში შეტანილი ამომრჩევლის სარეგისტრაციო მონაცემები (გარდა ფოტოსურათისა) შეესაბამება ამომრჩეველთა სიაში არსებულ მონაცემებს, მაგრამ ამომრჩევლის სახეს და წარდგენილ პირადობის დამადასტურებელ დოკუმენტში არსებულ ფოტოსურათს ერთმანეთთან შეუსაბამოდ მიიჩნევთ, აღნიშნული შეუსაბამობის დადასტურების თაობაზე მიმართეთ კომისიის თავმჯდომარეს და დაელოდეთ მის მიუთითებებს. თუ

კომისიის თავმჯდომარე შეუსაბამობას არ დაადასტურებს, უფლება გაქვთ, კენჭისყრის დღის ჩანაწერთა წიგნში მიუთითოთ თქვენი განსაკუთრებული აზრი, რასაც კომისიის მდივანთან ერთად ამომწებთ ხელმოწერით. წარდგენილ პირადობის დამადასტურებელ დოკუმენტში არსებულ ფოტოსურათთან ამომრჩევლის სახის შეუსაბამოდ მიჩნევის მიუხედავად, ამომრჩეველი იღებს მონაწილეობას კენჭისყრაში.

- V. ამომრჩევლის მონაცემთა შესაბამისობის დადასტურების შემთხვევაში, ამომრჩეველს გაუკეთეთ მარკირება მარჯვენა ხელის ცერა ან საჩვენებელი თითის ფრჩხილზე, თუ აღნიშნული მოქმედების შესრულება შეუძლებელია - მარჯვენა ხელის სხვა თითებზე, ხოლო თუ ესეც შეუძლებელია, იმავე წესით მარცხენა ხელზე.



ყურადღება!

- ამომრჩეველს, რომელსაც არ აქვს ზედა კიდურები („ფიზიკური მდგომარეობა“) არ უტარდება მარკირების პროცედურა.
- მარკირების პროცედურის გავლაზე უარის შემთხვევაში, ამომრჩეველს არ აქვს კენჭისყრაში მონაწილეობის უფლება. ამომრჩეველს განუმარტეთ უარის თქმის მიზეზი და სთხოვეთ დატოვოს კენჭისყრის შენობა.

- VI. მარკირების პროცედურის განხორციელების შემდეგ, ხელი მოაწერეთ ამომრჩეველთა სიის სათანადო გრაფაში და მიუთითეთ ამომრჩეველს, სიაში ხელმოწერით დაადასტუროს საარჩევნო ბიულეტენის მიღება.

ყურადღება!

- იმ ამომრჩევლის გვარის გასწვრივ, რომელსაც არ აქვს ზედა კიდურები (ფიზიკური მდგომარეობა), ამომრჩევლის ხელმოწერის ადგილზე, გააკეთეთ ჩანაწერი „ფიზიკური მდგომარეობა“ და აღნიშნული დაადასტურეთ თქვენი ხელმოწერით.
- თუ კენჭისყრის პროცესში გამოვლინდა, რომ ამომრჩეველმა საარჩევნო სიაში ხელი მოაწერა სხვა ამომრჩევლის გვარის გასწვრივ არსებულ გრაფაში, ასეთ შემთხვევაში ამომრჩეველმა, რომლის გვარის გასწვრივ ფიქსირდება ხელმოწერა, ხელი უნდა მოაწეროს იმავე გრაფაში. აღნიშნულის თაობაზე უნდა დაწეროთ ახსნა-განმარტება (ამომრჩევლის ერთიან სიაში რიგითი ნომრის, სახელისა და გვარის მითითებით).

- VII. საარჩევნო ბიულეტენის/ბიულეტენების გაცემამდე, ხელი მოაწერეთ საარჩევნო ბიულეტენის/ბიულეტენების წინა გვერდზე სათანადო გრაფაში და საარჩევნო ბიულეტენი/ბიულეტენები დაამოწმეთ რეგისტრატორის სპეციალური ბეჭდით.

ყურადღება!

სპეციალურ სიაში რეგისტრირებული ამომრჩევლისთვის, შესაბამისი სახეობის არჩევნების მიხედვით გადასაცემი საარჩევნო ბიულეტენების რაოდენობის დადგენის მიზნით, იხელმძღვანელოთ სპეციალურ სიაში ამომრჩევლის მონაცემების გასწვრივ გრაფაში მითითებული ინფორმაციით.

VIII. ამომრჩეველზე გაცემი საარჩევნო ბიულეტენი/ბიულეტენები და განუმარტეთ შევსების წესი:

განმარტება ამომრჩევლისთვის, რომელიც მონაწილეობს სამივე სახის არჩევნებში (საკრებულოს პროპორციული, საკრებულოს მაჟორიტარული და მერის არჩევნები), ან ორი სახის არჩევნებში (საკრებულოს პროპორციული და მერის არჩევნები):



„ხმის მისაცემად თითოეული სახეობის საარჩევნო ბიულეტენში შემოხაზეთ თქვენთვის სასურველი მხოლოდ ერთი საარჩევნო სუბიექტის გასწვრივ მითითებული რიგითი ნომერი. შევსების შემდეგ საარჩევნო ბიულეტენები გადაკეცეთ ისე, რომ არ ჩანდეს თქვენ მიერ გაკეთებული არჩევანი. ფარული ხმის მიცემის კაბინიდან გამოსვლის შემდეგ, დაკეცილი საარჩევნო ბიულეტენები თავადვე მოათავსეთ სპეციალურ კონვერტში და ჩააგდეთ საარჩევნო ყუთში.“

განმარტება ამომრჩევლისთვის, რომელიც მონაწილეობს მხოლოდ ერთი სახის არჩევნებში (საკრებულოს პროპორციული არჩევნები):



„ხმის მისაცემად საარჩევნო ბიულეტენში შემოხაზეთ თქვენთვის სასურველი მხოლოდ ერთი საარჩევნო სუბიექტის გასწვრივ მითითებული რიგითი ნომერი. შევსების შემდეგ საარჩევნო ბიულეტენი გადაკეცეთ ისე, რომ არ ჩანდეს თქვენ მიერ გაკეთებული არჩევანი. ფარული ხმის მიცემის კაბინიდან გამოსვლის შემდეგ, დაკეცილი საარჩევნო ბიულეტენი თავადვე მოათავსეთ სპეციალურ კონვერტში და ჩააგდეთ საარჩევნო ყუთში.“

IX. მიუთითეთ ამომრჩეველს გადაინაცვლოს ფარული ხმის მიცემის კაბინაში.

რა უნდა გაითვალისწინოს რეგისტრატორმა ფუნქციის შესრულებისას:

- თუ დაფიქსირდა, რომ კენჭისყრის შენობაში ხმის მისაცემად გამოცხადებული ამომრჩეველი შეყვანილია სხვა უბნისთვის განკუთვნილ სპეციალურ სიაში, ამომრჩეველს აეკრძალება საარჩევნო უბანში კენჭისყრაში მონაწილეობა. ამომრჩეველს განუმარტეთ, რომ კენჭისყრაში მონაწილეობის მისაღებად იგი უნდა მივიდეს შესაბამის საარჩევნო უბანში.
- თუ დაფიქსირდა, რომ კენჭისყრის შენობაში ხმის მისაცემად გამოცხადებული ამომრჩეველი შეყვანილია გადასატანი საარჩევნო ყუთის სიაში, ასეთ ამომრჩეველს აეკრძალება საარჩევნო უბანში კენჭისყრაში მონაწილეობა.

ლეობა. ამომრჩეველს განუმარტეთ, რომ მოთხოვნის შესაბამისად, ამომრჩევლისთვის გათვალისწინებულია გადასატანი საარჩევნო ყუთით ხმის მიცემის სერვისი.

- შეზღუდული შესაძლებლობის მქონე ამომრჩეველთა არჩევნებში დამოუკიდებლად მონაწილეობის ხელშეწყობის მიზნით:

- ✓ დაიცავით შშმ ამომრჩევლებთან საუბრისა და ქცევის ეტიკეტი.
- ✓ მცირემხედველ ამომრჩევლს, მოთხოვნის შესაბამისად, გადაეცით გამადიდებელ ლინზა.

- ✓ უსინათლო ამომრჩეველს გადაეცით სპეციალურ ჩარჩო-ფორმაში მოთავსებული საარჩევნო ბიულეტენი, იმგვარად, რომ საარჩევნო ბიულეტენის შესავსებ ჩარჩო-ფორმაში არსებული ყოველი წრიული ჭრილი ემთხვეოდეს ბიულეტენში არსებული საარჩევნო სუბიექტების წინ არსებულ რიგით ნომერს. განუმარტეთ ამომრჩეველს, რომ ფარული ხმის მიცემის კაბინაში საარჩევნო ბიულეტენების შესავსები ჩარჩო-ფორმის გამოყენებით საარჩევნო ბიულეტენების შევსების შემდეგ, ბიულეტენები უნდა ამოიღოს ჩარჩო-ფორმიდან, გადაკეცოს და ძირითად საარჩევნო ყუთში ჩაშვების მიზნით მოათავსოს სპეციალურ კონვერტში.



- თუ კენჭისყრის შენობაში მყოფი პირების მხრიდან ვლინდება შემთხვევები, როგორიცაა: კომისიის წევრის საქმიანობაში ჩარევა; ამომრჩევლისთვის პირადობის დამადასტურებელი დოკუმენტის გამორთმევა/ჩვენების მოთხოვნა/ფოტოვიდეო-გადაღება ან სხვაგვარი დამუშავება; კომისიისთვის განკუთვნილ ამომრჩეველთა სამაგიდე სიებში ამომრჩევლის მონაცემების ფოტოვიდეოგადაღება ან სხვაგვარი დამუშავება - მოახდინეთ მყისიერი რეაგირება, მიუთითეთ დამრღვევს აღკვეთოს კანონსაწინააღმდეგო ქმედება და ფაქტთან დაკავშირებით აცნობეთ კომისიის თავმჯდომარეს.

საკრებულოს პროპორციული არჩევნებისთვის კენჭისყრაში/არჩევნებში მონაწილე ამომრჩეველთა რაოდენობის (ამომრჩეველთა აქტივობა) დადგენის მიზნით, გაითვალისწინეთ შემდეგი:

- საკრებულოს პროპორციულ არჩევნებში მონაწილე ამომრჩეველთა რაოდენობის დადგენა ხდება 10:00, 12:00, 15:00, 17:00 საათზე. კენჭისყრაში/არჩევნებში მონაწილე ამომრჩეველთა საბოლოო რაოდენობის მონაცემები დგინდება კენჭისყრის პროცესის დასრულების შემდეგ (სრულდება 20:00 საათზე).
- ზემოაღნიშნული საათების მიხედვით საკრებულოს პროპორციულ არჩევნებში მონაწილე ამომრჩეველთა რაოდენობის დასადგენად, კომისიის თავმჯდომარის მითითებით, კენჭისყრის პროცესისთვის ხელის შეუშლელად, უნდა დათვალოთ ამომრჩეველთა ხელმოწერების რაოდენობა კომისიისთვის განკუთვნილ ამომრჩეველთა სამაგიდე სიებში. აღნიშნულ მონაცემს ემატება ამომრჩეველთა ხელმოწერების რაოდენობა გადასატანი საარჩევნო ყუთის სიაში (ასეთის არსებობისას).

ყურადღება!

საკრებულოს პროპორციულ არჩევნებში მონაწილე ამომრჩეველთა და-
თვლილი რაოდენობის სისწორის კონტროლის მიზნით:

- ✓ კომისიის თავმჯდომარის მითითებით, ამომრჩეველთა სიებში ხელ-
მოწერების რაოდენობის გარდა, უნდა გადათვალოთ თქვენ მიერ
საკრებულოს პროპორციული არჩევნებისთვის გაცემული საარჩევნო
ბიულეტენების რაოდენობა (კომისიის თავმჯდომარისთვის გადაცემული
გაფუჭებული საარჩევნო ბიულეტენების რაოდენობის ჩათვლით). გა-
ცემული საარჩევნო ბიულეტენების რაოდენობის დასათვლელად,
კომისიის თავმჯდომარისგან მიღებული საარჩევნო ბიულეტენების
რაოდენობას გამოაკელით დარჩენილი საარჩევნო ბიულეტენების
რაოდენობა.
- ✓ კომისიის თავმჯდომარე, თქვენგან მიღებული მონაცემების საფუძვე-
ლზე, ამოწმებს საკრებულოს პროპორციულ არჩევნებში მონაწილე ამომ-
რჩეველთა დათვლილი რაოდენობის სისწორეს: რეგისტრატორების
მიერ გაცემული საარჩევნო ბიულეტენების ჯამური რაოდენობას აკლებს
გაფუჭებული საარჩევნო ბიულეტენების ჯამურ რაოდენობას. მიღებუ-
ლი შედეგი ტოლი უნდა იყოს ამომრჩეველთა ხელმოწერების ჯამური
რაოდენობის.
- ✓ თუ მონაცემებს შორის სხვაობა გამოვლინდა, შესაბამისმა რეგისტრა-
ტორმა დაუყოვნებლივ უნდა დაწეროს ახსნა-განმარტება.

**მერის და საკრებულოს მაჟორიტარულ არჩევნებში მონაწილე ამომ-
რჩეველთა რაოდენობის (ამომრჩეველთა აქტივობა) დადგენის მიზნით,
გაითვალისწინეთ შემდეგი:**

- მერის და საკრებულოს მაჟორიტარულ არჩევნებში მონაწილე ამომრჩეველთა
რაოდენობა ითვლება მხოლოდ 12:00, 17:00 საათის მდგომარეობით და კენ-
ჭისყრის პროცესის დასრულების შემდეგ (სრულდება 20:00 საათზე).
- რეგისტრატორი, რომელიც ამომრჩეველთა რეგისტრაციას ახორციელებს
სპეციალური სიით, ვალდებულია, ზემოაღნიშნული საათების მიხედვით მე-
რის და საკრებულოს მაჟორიტარულ არჩევნებში მონაწილე ამომრჩეველთა
რაოდენობის დასადგენად, კომისიის თავმჯდომარის მითითებით, კენჭისყრის
პროცესისთვის ხელის შეუშლელად, დაითვალოს იმ ამომრჩევლების ჯამური
ოდენობა, რომლებმაც არჩევნებში მონაწილეობა მიიღეს სპეციალური სიით
და არ აქვთ მერის/საკრებულოს მაჟორიტარულ არჩევნებში მონაწილეობის
უფლება.

